

Visoki predstavnik i ambasador Barry razgovarali o izmijenjenom Nacrtu izbornog zakona sa predsjednicima Klubova i predstavnicima političkih stranaka

Danas su se Visoki predstavnik Wolfgang Petritsch i ambasador Barry, šef OSCE misije u Bosni i Hercegovini, susreli sa predsjednicima klubova u BiH parlamentu i predstavnicima političkih stranaka u cilju razgovora o izmijenjenom Nacrtu izbornog zakona.

Visoki predstavnik i ambasador Barry ocjenjuju sastanak korisnim. Utvrđena su i istaknuta sporna pitanja. Rasprava između predsjednika klubova i predstavnika političkih stranaka se nastavlja u subotu.

Visoki predstavnik i ambasador Barry pozivaju parlamentarce i političke stranke u Bosni i Hercegovini da postizanjem kompromisa koji će omogućiti usvajanje izbornog zakona pokazu svoju opredijeljenost za demokratski proces.

Jos prije dvije godine OHR i OSCE su pokrenuli proces s ciljem da se u Bosni i Hercegovini stvori jedan moderni, napredni izborni zakon. Prvi nacrt, koji je izradila grupa domaćih i međunarodnih eksperata, je u oktobru prošle godine dostavljen Parlamentu Bosne i Hercegovine koji ga je razmatrao u decembru. Međutim, Parlament je izglasao da se o njemu čak i ne raspravlja niti da se vrše izmjene i dopune. U ovom kontekstu, OHR i OSCE pohvaljuju napore Socijaldemokratske stranke koja je bar iznijela svoj nacrt na diskusiju i debatu.

U nastojanju da dobiju parlamentarnu podršku izbornog zakona, OSCE i OHR su izmijenili prvi nacrt na taj način što su izbacili najkontroverznije poglavlje i unijeli izrecene konstruktivne kritike.

Imperativ je da Bosna i Hercegovina usvoji izborni zakon kako bi mogla biti primljena u članstvo Vijeća Evrope. OSCE i OHR su naznačili da se zakon mora usvojiti do 10. februara, a najkasnije do 15. februara kako bi se prema novom zakonu mogli održati izbori kako je to planirano u oktobru.

Visoki predstavnik i ambasador Barry izražavaju iskrenu nadu da će ovaj nacrt poslužiti kao osnova za dalje diskusije i dovesti do usvajanja izbornog zakona.